

Untuk mengetahui lebih dekat projek2 pembangunan dilaksana

Cadangan lawatan mengejut ke jabatan kerajaan

IPOH, Isnin — Menteri-menteri kabinet pimpinan Datuk Seri Dr. Mahathir Mohamad hari ini, dicadangkan mengadakan lawatan mengejut ke jabatan-jabatan kerajaan untuk mengetahui lebih dekat pelaksanaan projek-projek pembangunan.

Menteri Besar Perak, Datuk Seri Haji Wan Mohamad bin Haji Wan Teh, dalam satu wawancara di kediamannya di sini pagi ini, berpendapat dengan cara ini akan dapat memperkemaskan lagi jentera kerajaan bagi mempercepatkan pelaksanaan rancangan-rancangan pembangunan seperti yang dijadualkan.

"Setakat mendengar taklimat dan menerima laporan pegawai-pegawai sahaja tidak memadai

untuk mengafasi masalah ini tambahnya.

Mengulas 'rombakan Kabinet Perdana Menteri baru, yang diumumkan Sabtu lalu, Menteri Besar bersetuju dengan Kementerian Pembangunan Negara dan Luarbandar diwujudkan semula agar dapat mengesan rancangan-rancangan pembangunan.

"Walaupun banyak rancangan yang telah dilancarkan; termasuk Rancangan Malaysia Keempat tetapi tidak dapat dinafikan Kementerian ini akan menitikberatkan lagi rancangan memajukan keadaan luarbandar terutama penduduk-penduduk kampung yang masih belum menikmati kemudahan yang diper-

lukan,"katanya.

Datuk Seri Haji Wan Mohamed memandang berat masalah penduduk kampung yang menghadapi kesukaran mendapatkan kemudahan seperti bekalan elektrik dan air paip.

Bellau bagi pihak rakyat dan kerajaan negeri mengalu-alukan pembentukan kabinet baru yang disifatkan sebagai 'Kabinet Bertindak Mahathir' dan sesuai dengan kehendak pembangunan negara.

Perlantikan mereka katanya, sudah kena pada tempatnya dan perlu mendapat sokongan dari setiap pihak untuk menjamin tugas-tugas yang diamanahkan kepada mereka berjalan dengan teratur.

Datuk Seri Haji Wan Mohamed amat berpuashati dengan perlantikan dua pemimpin UMNO Perak untuk turut serta dalam rombakan Kabinet Datuk Seri Dr. Mahathir itu, sebagai Timbalan Menteri.

Perantaraan

Mereka ialah Duta Besar Malaysia, Datuk Seri Haji Kamaruddin bin Mat Isa yang dipanggil pulang dari Arab Saudi, untuk memegang jawatan di Jabatan Perdana Menteri dan Encik Idris Abdul Rauf, bekas Setiausaha Parlimen Kementerian Perumahan Awam dan kini di Kementerian Wilayah Persekutuan.

"Apa yang kita hajatkan selama ini, sekurang-kurangnya telah diberi perhatian serius oleh Perdana Menteri dan kita harap kedua-dua Timbalan Menteri dari Perak itu akan dapat menjadi orang perantaraan kerajaan Negeri dengan kerajaan Pusat," tambahnya.

Sebelum ini, setelah pengunduran bekas Timbalan Menteri Perumahan dan Kerajaan Tempatan, Datuk Haji Hamid Omar yang ditewaskan dalam percubaan Ketua UMNO Bahagian Bagas Serai, Perak hanya diwakili oleh Encik Idris dalam kabinet, itupun selaku Setiausaha Parlimen.

Sementara itu, umat Islam terutamanya diseru supaya menumpukan kerja-kerja yang mendatangkan manfaat sebagai menghormati "Nuril Quran" hari ini.

Bahan asal dari Arkib
Negara Malaysia